

## Leev Tante Finchen.

Stell dech vör, em letzte Jahr hatte mer en Hassels e bajuwarisch Erläwnis. Din Schötze on de Fastelovensjecke us Riesholz hant e Oktoberfest jemaht. Drei Daach wor remmi demmi op dem Kermesplatz met Scheffschaukel on Humbtata-Mosick. Do wollt' ech natürlisch nit zoröckstonn, on ben met em Jupp zosamme dohen jejange. Wie ech et Mondaachs en mi Portemaneeke kick, han ech jedacht, do wör en Kawasaki dörchjefächt. Boh, es dat en et Jeld jejange. Die hant zwar e doll Projramm em Zelt dörchjetrocke, äwer doför moßte mer och janz schön Eintrittsjeld berappe. Em Benroder Dareblatt wor hengerher zo läse, dat et zwesche de beide Vereine janz schön jekracht han moß. Wie ech jehöht han, wolle de Schötze diss Jahr wedder e Oktoberfest optrecke. Trotz allem Wohlwolle us de politische Kreise, schingt et, dat doför en Jenehmijung nit janz einfach zo krieje sin soll.



Deht do wedder de Amtsschimmel wiehere?

Jetz noch wat, leev Tant, mech deht et jewaltisch stenke, dat he en onserem Hassels en kleene jemötliche Kneipe zojemaht hätt. Ech sprech he vom „Hasseler Jong“. De Pächter, dat Rejementskönichspaar vom letzte Jahr, hätt de Sejel gestrecke. De Lütt, die do en on us jejange send, süht m'r och emmer seltener, weil se sech, wenn se mol e Beer drenke wolle, all' op de verschiedene Kneipe verdelit hant. On dat Schärfste es, dat dä Hasseler Jong jetz seit öwer e halb Jahr leersteht - de Pohze verschosse send, on sech nix deht. Ech han jehofft, dat de Kneipe erjendwann emol wedder opmäkt. Äwer wie et ussüht, bleibt dat och so. En Schand es dat! Mehr hant zwar he en Hassels noch jenoch Pinte, äwer erjendwat fellt he...

En dinnem Schötzeverein es jot wat loss! Die hant jetz en janz neue Kompanie jejründet, alles Rieder. Kohm jejründet, hant die schon öm de zwanzisch Mann. Och entschuldije, „Mann“ darf ech janit sare, weil do och Wiewer dobei send. On dat wohr jo dä Knackponkt! Wat hant do e paar jemeckert on jesaht, Wiewer en Uniform, wie süht dat denn us? Dat jehnt nit! On ob dat jehnt! Am Volkstrauerdaach wor ech om Hasselser Kerkhoff, on do wor och de neue Kompanie fast komplettemang dobei, trotz Sauwähler. Vom jüngste Puht bes zom älsde Kähl, nur de Pähds wore an dem Daach nit dobei. All' en schmucker Riederuniform. Do hant de Lütt äwer jekickt. Ech freu' mech schon op de Zoch am Schötzefestsonndaach, wenn die met ehre Pähds ongerwechs send. Apropo Pähds! Wo jetz de Rieder em Verein send, könnt' jo och dä Oberst on sinne Major bei denne mol liere, wie mer op e Pähd kütt. Vör zwei Jahr brochten de Oberst fast zwanzisch Minudde, weil dat Pähd nit vör de Kerketrepp wollt, on letztes Jahr es dem Major beim opsteije dä Steijchbüjel afjejange, do wöhr da bald op senne Belderlade jefalle. Ech wollt' denne beide schon sare, dat se et zoesch leewer mehr Fahrräder versöke sollte, do könnte se dä Sattel deefer stelle! Äwer ech hoff' jo, dat es diss Jahr besser klappe deht. Ech freu' mech op jede Fall schon op dat Schötzefest. Wör schön, wenn de och kicke köhmst, do kannste jo jlich minne Scheck metbrenge, denn dat Schötzefest wöhd bestemmt wedder lecker dühr.

Bes dohen, on schöne Jroß



## Din Hänchen.